

Evening Dogri News Bulletin, 23 January. 2026

इवनिंग डोगरी न्यूज़ बुलेटिन

समे .18:15 Hrs

<><><><><><>

Headlines

1. मुखमंत्री उमर अब्दुल्ला होरें लोकें दी आसें-मेदें ते जरूरतें गी ध्यानै च रखदे होई बजट त्यार करने आस्तै कश्मीर थमां मुतल्लका धड़ें कन्नै सलाह-सूत्र आहली बैठक लाई।
2. कश्मीर घाटी च तेज बहाऊ ते बर्फबारी करी जन-जीवन प्रभावित होआ, मुखमंत्री होरें आखेआ जे हालात च बल्लें-बल्लें सुधार होआ'रदा ऐ।
3. कश्मीर घाटी च जरूरी चीजें-बस्तें ते अनाज दी उपलब्धता यकीनी बनाने लेई चौलें कन्नै लदोई दी पैहली पूरी माल गड्डी अनंतनाग पुज्जी।
4. श्री माता वैशणो देवी भवन पर रूतै दी पैहली-पैहली बर्फबारी होई।
5. ते भारी बर्फबारी कारण जम्मू-कश्मीर दिएं प्रमुख-प्रमुख जरनैली शिड़कें गी गड्डियें दी आओजाई लेई बंद करी दित्ता गेआ, श्रीनगर ब्हाई अड्डे पर तकरीबन 17 डोआरियां रद्द।

<><><><><><>

CM-Pre Budget Meet

मुखमंत्री उमर अब्दुल्ला होरें लोक केंद्रित बजट त्यार करने दे जतनें दे इक हिस्से दे तौरा पर अज्ज कश्मीर डिविजन दे बक्ख-बक्ख हितधारकें कन्नै बजट शा पैहले सलाह-सूत्र कीता। अज्ज आहली बैठक च उद्योग, बपार, सैलसफा, बागवानी, राई-बाई ते शिक्षा आले क्षेत्र दे नुमाइंदें हिस्सा लैता। इस दरान लोकें आसेआ सुझाएं गी प्राथमिकता देने पर ध्यान केंद्रित कीता गेआ तां जे औंदे बजट च उंदियें आसें-तांगें ते जरूरतें गी उजागर कीता

जाई सकै। मुखमन्त्री होरें बजट बनाने दी प्रक्रिया च समावेशी गल्लबात ते हितधारें दी हिस्सेदारी दे महत्व पर जोर पाया। अज्ज आली बैठक बी प्रदेश च चला'रदी सलाह-सूत्र आली बैठकें दी श्रृंखला दा गै इक हिस्सा ही। .

<><><><><><>

CM-Damages

मुखमन्त्री उमर अब्दुल्ला होरें अज्ज आखेआ जे उआं ते प्रशासन नै बर्फबारी लेई पूरी त्तारी कीती दी ऐ, पर तेज ब्हाएं ते भारी बर्फबारी कन्नै कश्मीर घाटी च मता नुकसान पुज्जा ऐ जेह्दे करी बिजली सप्लाई ते होर दुइयें जरूरी सेवाएं पर बी माड़ा असर पेआ ऐ। इस बारै पत्रकारें कन्नै गल्लबात दरान मुखमन्त्री होरें गलाया जे प्रशासन नै पैहले थमां गै सब्बै त्तारियां कीती दियां न, पर तेज ब्हाऊ ते बर्फबारी नै घाटी च तकरीबन पूरी बिजली बवस्था गी बाधित करी दित्ता ऐ। उनें अग्गे आखेआ जे इयां ते आमतौरा पर घाटी च हर रोज तकरीबन 1 ज्हार 700 मेगावाट बिजली पैदा औंदी ऐ पर बुनियादी ढांचे गी नुकसान पुज्जने करी अज्ज बडुलै सप्लाई बड़ी मती घटियै छड़ी 100 मैगावाट गै रेई गेई।

<><><><><><>

Good Rake Rice

कश्मीर घाटी च जरूरी चीजें-बस्तें दी उपलब्धता गी यकीनी बनाने दे मकसद कन्नै उत्तरी रेलवे दे जम्मू डिविजन नै वीरवारें 24एं घैंटें दे अंदर-अंदर पंजाब दे संगरूर थमां चौलें कन्नै लदोए दे इक रेक गी अनंतनाग पजाया। आकाशवाणी दे जम्मू संवाददाता नै जानकारी दित्ती ऐ जे सीनियर डिविजनल कमर्शियल मैनेज उचित सिंघल होरें आखेआ ऐ जे भारती खाद्य निगम यानि एफ.सी.आई थमां अनाज दी इस पूरी रेक दा कामयाबी कन्नै घाटी पुज्जना जम्मू-कश्मीर लेई इक बड़ी बडुली गल्ल ऐ। मेद ऐ जे एह रेक आम जनता ते बपारियें लेई जरूरी चीजें-बस्तें दी उपलब्धता च सुधार आहन्नोग। रेलवे ते एफ.सी.आई नै सांझे तौरा पर अनाज लेई जाने आहली एह माल रेल सेवा शुरू कीती ऐ।

<><><><><><>

PM-Svanidhi

रेहड़ी-फड़ी लाने आलें आस्तै शुरू कीती गेदी पी.एम स्वनिधि योजना तैहत प्रधानमंत्री नरेंद्र मोदी होरें अज्ज मुलख भरै च इस योजना दे लाभार्थियें गी वर्चुअल तरीके राहें क्रेडिट कार्ड सौंपे। इस मौके पर साम्बा दे जिला मुख्यालय च बी इक कार्यक्रम दा सरिस्ता कीता गेआ जेहदे च डिप्टी कमिशनर आयूशी सूदन होरें तकरीबन 14 लाभार्थियें गी क्रेडिट कार्ड बंडु ते उनेंगी इस स्कीम दा पूरा-पूरा लाहू ठोआने लेई प्रोत्साहित बी कीता। डी.सी होरें होरनें लोकें गी बी इस स्कीम दा फायदा ठोआने लेई जोर भरेआ। उनें आखेआ इस मौके पर इक लाभार्थी विक्रेता रोहित कुमार होरें आखेआ



Prog. Ann. Constitution

आकाशवाणी जम्मू दा क्षेत्रीय समाचार एकांश 77में गणतंत्र दिवस मनाने दे सरबंध च 24 जनवरी 2026 गी 30 मिंटे दी अवधि आला इक खास परिचर्चा कार्यक्रम गी पेश करने जा'रदा ऐ। इस खास कार्यक्रम दा विशे होग 'Our constitution our strength' यानि स्हाडा संविधान स्हाडी ताकत। एहू खास कार्यक्रम शनिवारें 24 जनवरी दपैहरी साडे 12 बजे प्रसारित कीता जाहग। रक्षा समीक्षक दे तौर पर ब्रिगेडियर डी.एन पांडे, ते संविधान माहिर दे तौर पर विजय सहगल जेडे लाँ विभाग जम्मू युनिवर्सिटी दे प्रोफेसर न- होर इस कार्यक्रम च परौहने होडन जेडे विशे पर अपने बचार सांझा करडन.....



Snowfall SMVDS

श्री माता वैश्वो देवी दी पवित्तर गुफा च स्याले दी पैहली बर्फबारी होई ऐ, जेदे करी त्रिकुटा पर्वत बर्फीली सफेद चादर कन्नै खटोई गेआ ऐ। आकाशवाणी जम्मू दे संवाददाता हुं'दी रिपोर्ट मुजब इस बर्फबारी कन्नै श्रद्धालुएं च जोश भरोची गेआ ऐ, जिस करी ओहू पौंदी बर्फ च बी मत्था टेका'रदे ना। तापमान च खरी कटौती होई गेई ऐ, जेदे

करी मां वैशणो देवी जी दी गुफा दे रस्ते गी साफ रखने लेई प्रशासन आसेआ जरूरी हीले कीते गेदे न तां जे आने-जाने आहले लोकें गी रस्ते च कुसा परेशानी दा सामना नेई करना पवै।

<><><><><><>

Traffic (Dispatch)

ताजा बर्फबारी होने करी जम्मू-श्रीनगर राष्ट्री जरनैली शिड़क एन.एच-44 पर ट्रैफिक दौनें पास्से अज्ज बडुलै थमां रूकी दी ऐ। जम्मू ते श्रीनगर बश्कार गड्डियें दी आओजाई बंद कीती ऐ कीजे शिड़कै पर बर्फ जमा होई दी ऐ।

एन.एच-44 दे कन्नो-कन्नो मुगल रोड, श्रीनगर-सोनमर्ग-गुग्री एसएसजी रोड ते सिंथन रोड गी बी बर्फबारी होने करी बंद करी दित्ता गेआ ऐ। आम लोकें गी सलाह दित्ती गेदी ऐ जे ओहू इनें शिड़कं उप्पर पूरी बहाली होने तगर सफर नेई करना। तोआई बर्फ पौने करी श्रीनगर ब्हाई अड्डे थमां घट्टोघट्ट 17 फ्लाइटां रह कीतियां गेदियां न।

<><><><><><>

Rescue Operaton Udhampur

बसंतगढ दे छोछरू गल्ला इलाके च खराब मौसम करी फसे दे 12 लोकें गी उधमपुर पुलस नै समेंसिर बचाई लैता जिंदे च महिलां ते बच्चे बी शामिल हे। इनें 12 लोकें दे फसने दी जानकारी पुलस पोस्ट संग च मिली ही, जेदे मगरा पुलस दी इक टीम गी उनेंगी बचाने लेई भेजेआ गेआ। पुलस दी टीम गी फसे दे इनें लोकें गी बचाने लेई कई किलोमीटर पैदल बर्फ कन्नै ढकोई दी प्हाड़ी पर चढना पेआ।

<><><><><><>

Prog. Ann. Girl Child

आकाशवाणी दा क्षेत्रीय समाचार एकांश जम्मू कल यानि 24 जनवरी गी “राश्ट्र बालिका ध्याड़े” दे मौके पर 25 मिन्टें दी इक विशेष परिचर्चा प्रसारत करने जा’रदा ऐ। दपैहरी 12 बजे प्रसारत होने आहली इस परिचर्चा दा विषे सार ऐ- “Empower the girl empower the nation यानि कुडियें दा सशक्तिकरण, राश्ट्र दा

सशक्तिकरण”। इस विशेष परिचर्चा च स्हाडे परौहने होगंन- समाज कल्याण विभाग दे डरैक्टर रंजीत सिंह जेहडे इस विषय पर अपने माहिराना विचार सांझे करगंन। कार्यक्रम दी मेजबानी करगंन स्हाडी न्यूज एंकर श्रुति खजुरिया।

<><><><><><>

Wreath

जम्मू दे टेक्रिकल ब्हाई अड्डे च अज्ज उनें 10 शहीदें गी श्रद्धांजलि दित्ती गई जिनें डोडा जिले दे भद्रवाह-चंबा इलाके च इक शिडक हादसे दरान अपनी जान मुहाई। एह श्रद्धांजलि उनेंगी व्हाईट नाइट कार्पस दे जनरल आफिसर कमांडिंग लेफ्टिनेंट जनरल पी. के मिश्रा हुंदे आसेआ दित्ती गई। इस मौके पर सेना, भारती वायु सेना, बीएसएफ, सीआरपीएफ, पुलस ते सिविल प्रशासन दे अधिकारी बी टेक्रिकल ब्हाई अड्डे पर मौजूद हे। शहीद होए दे सैनिकें दे शवें दे खीरी संस्कार आस्तै उन्दे रिहायशी जिलें च भेजेआ गेआ। इस बारै होर जानकारी स्हाडे जिला संवाददाता कोलां।

<><><><><><>